

**Aningaasanut tunngasumik ingerlatsivimmik (finansiel virksomhed), tassannga aningaasaateqarfik, sillimmasiisarfik, soraarnerussutisiaqarfik kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqqunneqarnissaannut Inatsisartut aalajangiiffigisassaattut siunnersuut. Nalunaarusiaq UKA2026 aallartinniginnerani Inatsisartunut agguanneqassaaq**  
*Inatsisartuni eqimattamit, Naleqqamit saqqummiunneqartoq*

## **pillugu**

**Inuussutissarsiornermut Aatsitassanullu Ataatsimiititaliap siunnersuutip aappassaaneerpeqarnissaanut**

## **ISUMALIUTISSIISSUTAA**

Ataatsimiititaliap suliamik suliarinninnermini ilaasortarai:

Inatsisartunut ilaasortaq Mariane Paviasen Jensen, Inuit Ataqatigiit, siulittaasoq  
Inatsisartunut ilaasortaq Juno Berthelsen, Naleraq, siulittaasup tullia  
Inatsisartunut ilaasortaq Hans-Erik Enoksen, Demokraatit  
Inatsisartunut ilaasortaq Lars Poulsen, Siumut  
Inatsisartunut ilaasortaq, Aqqalu C. Jerimiassen, Atassut

UKA2025-mi 4. november 2025-mi siullermeerinninnerup kingorna siunnersuut ataatsimiititaliamit misissorneqarpoq.

### **Siunnersuutip imarisaa siunertaalu**

Siunnersuuteqartup siunnersuummini aningaasanut tunngasumik ingerlatsivimmik (finansiel virksomhed), kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqqunneqarnissaat anguniarpaa, taassuma kingorna paasissutissat pigineqartut toqqammavigalugit oqallittoqarniassammat.

Kalaallit Nunaanni sipaakkat sillimmasiisarnermullu akiliutit assigisaallu Kalaallit Nunaanni aningaasaliissutigineqartarnissaat siunnersuummi tunngavilersuutigineqarpoq, nunani allani aningaasaliissutaanatik, soorlu Danmarkimi.

### **Inatsisartuni siullermeerinninneq**

Siunnersuut tamaat isigalugu tigulluarneqarpoq.

Nunatta aningaasaqarnermut immikkoortuini iliuserisinnaasaasa piginnittuuneratalu nukittorsarneqarnissaannik kissaateqarneq Naalakkersuisut isumaqatigalugu siullermeerinninnermi oqariartuutigaat. Nunatsinni pisortat suliffeqarfiutaasa piginneqatigiiffiutaasalu katillugit sillimmasiisarnermut aningaasartuutaasa appartinneqarnerunissaat qanoq ililluni anguneqarsinnaanersoq Naalakkersuisut misissueqqissaarnermik aallartitseresimallutik ilanngullugu ilisimatitsissutigaat. Tamannalu suliaq siunnersuummut tapertaasutut isigineqarpoq. Paasissutissat sukumiisut toqqammavigalugit ingerlaqqittumik oqallittoqarnissaa pillugu nalunaarusiortoqassasoq Naalakkersuisut aalajangiiffigisassatut siunnersuummut paasinnillutik tapersiippat.

Pisortanit pigineqartumik aningaasaanut tunngasumik ingerlatsivinnik pisariaqartitsisoqarnersoq arlaqartunit nangaanartoqartinneqartoq oqariartuutigineqarpoq, naak aalajangiiffigisassatut siunnersuummi nalunaarusiornissamik tapersersuisoqaraluartoq.

Tamanna tunuliaqutaralugu siunnersuut Inuussutissarsiornermut Aatsitassanullu Ataatsimiititaliamut suliareqqitassanngorlugu ingerlateqqinneqarsimavoq.

### **Siunnersuutip aningaasatigut kingunerisassai**

Misissuititsinermit pisortatigut aningaasartuutissat nalilerneqarput (125-250.000 koruuninut) missiliussagai, tassa sulisorineqartussap  $\frac{1}{4}$  -imiit  $\frac{1}{2}$ -imut ukiumut nalinga.

Aalajangiiffigisassatut siunnersuutip sinaakkutit taaneqartut malillugit piviusunngortinneqarsinnaanera ataatsimiititaliamit nalilerneqarpoq, aamma siullermeerinninnermi Naalakkersuisut tassunga naliliinnermut oqaaseqaateqarsimannginnerat ataatsimiititaliap maluginiarpa.

### **Ataatsimiititaliap siunnersuummut oqaaseqaatai**

Siunnersuummi misissorneqartussatut pineqartut pillugit nalunaarusiortoqarnissaa ataatsimiititaliap pitsaasutut isigineqarpoq, tassuunakkummi ersarissumik paasiniarluarneqarsimasumillu toqqammaveqarluni oqallinneq paasissutissat aallaavigalugit ingerlateqqinneqarniassammat.

### **Ataatsimiititaliap inassuteqaatai**

Aalajangiiffigisassatut siunnersuutip akuersissutigineqarnissaa ataatsimiititaliap isumaqatigiittup innersuussutigaa.

Taama oqaaseqarluni isumaliutissiisummut allassimasutut paasinnilluni ataatsimiititaliap siunnersuut aappasaaniigassanngortippaa.

---

Mariane Paviasen Jensen  
Siulittaasoq

---

Juno Berthelsen  
Siulittaasup tullia

---

Lars Poulsen

---

Aqqalu C. Jerimiassen

---

Hans-Erik Enoksen